

**Utoqqalinermi pensionisiat pillugit Inatsisartut peqqussutaannik allanngortitsineq
pillugu Inatsisartut peqqussutaat nr. xx, xx 2010-meersoq (Toqukkut qimagineerup
kingorna tunniussiarneq)**
(Isumaginninnermut Naalakkersuisoq)

pillugu

Ilaqtariinnermut Ataatsimiititaliap

ISUMALIUTISSISSLUTAA

Siunnersuutip aappassaaneerneqarnerani saqqummiunneqartoq

Ilaqtariinnermut Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Debora Kleist, Inuit Ataqatigiit
 Inatsisartunut ilaasortaq Jane Petersen, Inuit Ataqatigiit
 Inatsisartunut ilaasortaq Andreas Uldum, Demokraatit
 Inatsisartunut ilaasortaq Ruth Heilmann, Siumut
 Inatsisartunut ilaasortaq Knud Kristiansen, Atassut

Siunnersuut kiisalu siunnersuutip siullermeerneqarnerani UPA 2010-mi ulloq 27. april 2010-mi ingerlanneqartoq aammalu Inatsisartunut ilaasortat Naalakkersuisullu tamarmik siunnersuummut oqaaseqaatiminnik saqqummiussinissaannik periarfissiiffusoq Ilaqtariinnermut Ataatsimiititaliap erseqqinnerusumik misissorpai.

Siunnersuut pillugu

Siunnersuutip saqqummiunneqarneranut tunngaviuvoq aalajangiiffigisassatut siunnersuutip UKA 2009/44-p akuersissutigineqarnera, taanna inaarutaasumik akuersissutigineqarami ima oqaasertaqarpoq:

Katissimallutik aappariit inooqatigiilluunniit aappaata toqunerani qimagaasoq toqukkut qimagineerup utoqqalinermi imaluunniit siusinaartumik pensionisiaanik qaammatini marlunni pisartagaqarsinnaaqullugu utoqqalinermi pensionisat aammalu siusinaartumik pensionisiat pillugit maleruagassanut allannguutissatut siunnersuummik 2010-mi saqqummiussinissamut Naalakkersuisut peqquneqarnissaannik aalajangiiffigisassatut siunnersuut.

Siunnersuut pillugu tusarniaaneq

Siunnersuut attuumassuteqartunut tusarniaassutigineqarsimavoq.

Ilaqutariinnermut Ataatsimiititaliap oqaaseqaatai

Siunnersuut saqqummiunneqartoq Ilaqutariinnermut Ataatsimiititaliamit tikilluaqquneqarpoq. Siunnersuut saqqummiunneqartoq aalajangiiffigisassatut siunnersuummit qulaani taaneqartumit annertunerusoq Ilaqutariinnermut Ataatsimiititaliaq isumaqarpoq, aalajangiiffigisassatummi siunnersuummi pensionisiallit katissimasut inooqatigiilluunniit pineqarmata. Utoqqalinermi pensionisiallip qimataata nammineq aamma pensionisiaqartuunissa siunnersuummi saqqummiunneqartumi piumasaqaatigineqanngimmat Ilaqutariinnermut Ataatsimiititaliap eqqarsarnartoqartinngilaa.

Siunnersummulli nassuaatit misisorerat erseqqissaateqarnissamut tunngavissiivoq. Siunnersummut nassuaatini § 1-imi oqaaseqatigiinni kingullerni kukkusumik ima allassimavoq:

“Taamaasilluni aalajangersagaq siunnersuutigineqartoq atorneqassanngilaq, pensionisiaqartoq toqukkut qimagunnermini katissimasaqanngippat inoqatigisaqanngippalluunniit.”

Utoqqalinermi pensionisiallip qimataata nammineq pensionisiaqartuunissa inatsisip oqaasertaani aalajangiisutinneqanngilaq. Utoqqalinermi pensionisiallit qimataannut (katissimallugu apparisaannut inooqatigisaannulluunniit) tamanut siunnersuut sammitinneqarpoq aammalu siunnersummut nassuaatini kukkusumik allassimaneratut atuuffia annikillisarneqassanani.

Inassuteqaat

Siuiani erseqqissaatit ilanngullugit siunnersuut maanna ilusimisut iluseqartoq akuersissutigineqassasoq ataatsimiititaliap isumaqatigittup inassutigaa.

Taama oqaaseqarluni Ilaqutariinnermut Ataatsimiititaliap siunnersuut aappassaaniigassanngortippaa.

Debora Kleist

Siulittaasoq

Jane Petersen

Andreas Uldum

Ruth Heilmann

Knud Kristiansen